



REPUBLIKA E KOSOVËS / REPUBLIKA KOSOVA

GJYKATA THEMELORE PRISHTINE

Numri i lëndës: 2023:144930

Datë: 29.04.2024

Numri i dokumentit: 05636584

P.nr.2433/23

NË EMËR TË POPULLIT

GJYKATA THEMELORE PRISHTINË - Departamenti i Përgjithshëm, me gjyqtarin e vetëm gjykues Bujar Ahmeti dhe praktikantin gjyqësor Sulltan Qallapeku, në çështjen penale kundër të pandehurit L.Z. nga P., rruga ..., banesat e S., hyrja ..., nr..., lagja ..., për shkak të veprës penale posedimi i paautorizuar i narkotikëve, substancave psikotrope ose analoge, nga neni 269 par.2 të Kodit Penal të Republikës së Kosovës (KPRK), i akuzuar sipas aktakuzës së Prokurorisë Themelore në Prishtinë - Departamenti i Përgjithshëm, PP.II.nr.2825/2023 të datës 26.06.2023, pas përfundimit të seancës së shqyrtimit fillestar publik me datë 24.04.2024, në prezencën e Prokurorit të Shtetit Rrahim Podvorica, të pandehurit L.Z. dhe mbrojtësit të tij av. N.R., me datë 25.04.2024 publikisht mori dhe shpalli, ndërsa me datë 29.04.2023, përpiloi këtë:

A K T G J Y K I M

I pandehuri,

L.Z., nga babai E. dhe nëna F., mbiemri i vajzërisë se nënës D., i lindur ..., në Gj., me vendbanim në Prishtinë., rruga ..., banesat e S., hyrja ..., nr..., lagja ..., i punësuar – merret me muzikë, i gjendjes së mesme ekonomike, ka të kryer shkollën e mesme, shqiptar, shtetas i Republikës së Kosovës, i identifikuar me numër personal

Ë S H T Ë F A J T O R

Sepse:

Me datë 06.04.2022, rreth orës 11:55 min, te i njëjti në shtëpinë e tij në rrugën “G.Z” në P., ishte gjetur një sasi e marihuanës në peshë prej 1 gram, e të cilën ai e kishte poseduar pa autorizim, e cila sasi e marihuanës ishte gjetur pas bastisjes, e cila ishte bërë me pëlqimin e të dyshuarit.

- *Me këto veprime ka kryer veprën penale **Posedimi i paautorizuar i narkotikëve, substancave psikotrope ose analoge nga neni 269 par.2 të KPRK-së.***

Prandaj, kjo gjykatë në bazë të neneve 4, 7, 17, 21, 38, 39 par. 1 pika 1.1, 40 par. 1 pika 1.3, 43, 69, 70, nenit 269 par. 2 dhe 3 të KPRK-së, dhe nenit 242, 364, 276 par. 1 dhe 2, si dhe 449 të KPP-së, të pandehurin e:

G J Y K O N

Me **DËNIM ME GJOBË** në shumë prej 300 € (treqind Euro), të cilin dënim obligohet ta paguaj në afat prej 15 (pesëmbëdhjetë) ditësh pas plotfuqishmërisë së aktgjykimit. Nëse i pandehuri nuk dëshiron ose nuk mund të paguaj gjobën në afatin e caktuar, gjykata do të veprojë në bazë të nenit 43 par. 3 të KPRK-së, ashtu që dënimi me gjobë do t'i zëvendësohet me dënim me burgim, ku një ditë burgim do të llogaritet me 20 € (njëzet euro) të gjobës.

Në mbështetje të nenit 276 par. 1 dhe 2 të KPP-së, si dhe nenit 269 par. 3 të KPRK-së, **URDHËROHET KONFISKIMI** i përhershëm i sendit dhe atë substanca narkotike e llojit Kanabis (Marihuanë), me peshë të përgjithshme prej 1 gram. Pas plotfuqishmërisë së këtij aktgjykimi, kjo substancë narkotike duhet të shkatërrohet nga Policia e Kosovës, në bashkëpunimin me institucione tjera relevante, sipas procedurave standarde në fuqi.

I pandehuri obligohet që t'i paguajë shpenzimet e procedurës penale dhe atë: në emër të paushallit gjyqësor shumë prej njëzet (20) Euro dhe në emër të fondit për kompensimin e viktimave të krimit shumë prej njëzet (20) Euro, të gjitha këto në afat prej pesëmbëdhjetë (15) ditëve, nga dita e plotfuqishmërisë së këtij aktgjykimi.

A r s y e t i m

Rrjedha e procedurës penale

Prokuroria Themelore në Prishtinë, me aktakuzën e saj me numër PP.II.nr.2825/2023 të datës 26.06.2023, të pandehurin L.Z. e ka akuzuar për shkak të veprës penale posedimi i paautorizuar i narkotikëve, substancave psikotrope ose analoge, nga neni 269 par.1 të KPRK-së.

Në seancën e shqyrtimit fillestar të datës 24.04.2024, Prokurori i Shtetit para se të lexohet aktakuza, e ndryshon përshkrimin faktik të dispozitivit të aktakuzës dhe njëherit e bënë rikualifikimin e veprës penale posedimi i paautorizuar i narkotikëve, substancave psikotrope ose analoge, nga neni 269 par.1 të KPRK-së në nenin 269 par. 2 të KPRK-së.

Gjykata pas vlerësimit të kompetencës lëndore dhe territoriale dhe duke vepruar sipas aktakuzës, me datë 24.04.2024 ka caktuar dhe mbajtur seancën e shqyrtimit fillestar, në të cilin seancë prezent ishin Prokurori i Shtetit Rrahim Podvorica, i pandehuri L.Z. dhe mbrojtësi i tij av. N.R., i angazhuar sipas autorizimit.

Gjyqtari i vetëm gjykues e ka udhëzuar të pandehurin për të drejtat konform nenit 241 par. 1 të KPP-së. Pas kësaj, Prokurori i Shtetit e ka lexuar aktakuzën dhe pasi gjyqtari u bind se i pandehuri e ka kuptuar aktakuzën, bazuar në dispozitën e nenit 241 par. 4 të KPP-së të njëjtë i ofroi mundësinë që të pranojë fajësinë ose të deklarohej i pafajshëm.

Në seancën e shqyrtimit fillestar i pandehuri në prezencën e mbrojtësit të tij dhe pas sqarimeve të nevojshme nga ana e gjykatës, deklaroi se e pranon fajësinë për veprën penale të rikualifikuar, e për të cilën e ngarkon aktakuza, se është i vetëdijshëm për pranimin e fajësisë dhe pasojat e këtij

pranimi, duke shtuar se ndjen keqardhje dhe kërkon falje, njëherit i propozon gjykatës që t'i shqiptoj një dënim sa më të butë.

Pasi që i pandehuri në seancën e shqyrtimit fillestar e ka pranuar fajësinë, konform nenin 242 par.5 të KPP-së gjyqtari ka marrë mendimin e mbrojtësit të pandehurit dhe prokurorit të shtetit lidhur me pranimin e fajësisë nga i pandehuri.

Mbrojtësi i të pandehurit ka deklaruar se e mbështet deklarin e të mbrojturit të tij, duke vlerësuar se pranimi i fajësisë ka mbështetje në nenin 242 par. 2 të KPP-së, ndërsa me rastin e shqiptimit të dënimit, i ka propozuar gjykatës që t'i ketë parasysh rrethanat lehtësuese të përcaktuara në nenin 70 të KPRK-së, pasi që nuk ka rrethana rënduese, ngase posedimi 1 gram marihuanë nuk ka pasur rrezikshmëri të përgjithshme shoqërore, për faktin se i njëjti e ka pasur për konsumim personal, bazuar në këtë, mbrojtësi ka propozuar që në mbështetje të nenit 71 par. 1 nën par. 1.3, e në lidhje me nenin 72 të KPRK-së, të pandehurit t'i shqiptoj një dënim sa më të butë.

Prokurori i Shtetit lidhur me pranimin e fajësisë nga ana e të pandehurit, deklaroi se nuk e kundërshton pranimin e fajësisë, pasi që pranimi i fajësisë është bërë konform dispozitës ligjore të nenit 242 të KPP-së dhe është në harmoni të plotë edhe me provat që gjenden në shkresat e lëndës, me të cilat vërtetohet se i pandehuri ka kryer veprën penale për të cilën është akuzuar, andaj i ka propozuar gjykatës që ta miratoj pranimin e fajësisë, të pandehurin ta shpallë fajtor dhe ta dënoj sipas ligjit. Ndërkaq me rastin e shqiptimit të dënimit, ka propozuar që si rrethanë lehtësuese të merret parasysh pranimin e fajësisë.

Vlerësimi i gjykatës lidhur me pranimin e fajësisë.

Gjykata, ka shqyrtuar pranimin e fajësisë të cilën e ka deklaruar i pandehuri dhe erdhi në përfundim se pranimi i fajësisë nga ana e të pandehurit për veprën penale të rikualifikuar nga ana e Prokurorit të Shtetit është bërë në pajtim me nenin 242 par. 2 të KPP-së dhe në pajtim me faktet dhe provat që përmban aktakuza, njëherit vlerësoi se i pandehuri e ka kuptuar natyrën dhe pasojat e pranimin të fajit, pranimi i fajësisë është bërë vullnetarisht dhe mbështetet në faktet dhe provat materiale të rastit konkret të cilat gjenden në shkresat e lëndës dhe se aktakuza nuk përmban asnjë shkelje të qartë ligjore apo gabime faktike, po ashtu gjykata sipas detyrës zyrtare dhe konform nenit 251 të KPP-së, nuk gjeti se ekziston ndonjë provë e papranueshme. Pasi gjyqtari i vetëm gjykuese u bind se i pandehuri e ka kuptuar natyrën, benefitet dhe pasojat e pranimin të fajësisë, si dhe pasi që konstatoi se pranimi është në përputhje me nenin 242 par. 2 të KPP-së, me aktvendim e aprovoi pranimin e fajësisë së të pandehurit, për veprën penale posedimi i paautorizuar i narkotikëve, substancave psikotrope ose analoge, nga neni 269 par.2 të KPRK-së.

Meqenëse i pandehuri e ka pranuar fajësinë për veprën penale e cila i vihet në barrë, e cila është në përputhje me kriteret e përshkruara më lartë, gjykata nuk është lëshuar në procedimin e provave në këtë çështje penale, por shqyrtimi fillestar ka vazhduar me shqiptimin e dënimit.

Gjendja faktike e vërtetuar.

Gjykata, nga pranimi i fajësisë së pandehurit dhe nga provat të cilat i janë bashkangjitur shkresave të lëndës, ka vërtetuar përtej dyshimit të bazuar mirë se në veprimet e të pandehurit formohen të gjitha elementet e veprës penale posedim i paautorizuar i narkotikëve, substancave psikotrope ose analoge, nga neni 269 par.2 të KPRK-së, të përshkruar sikurse në dispozitiv të këtij aktgjykimi, e për të cilën veprën penale është paraparë dënimi me gjobë ose me burgim deri në një (1) vit, dhe për këtë gjykata ka vendosur që të pandehurin ta shpall fajtor dhe t'i shqiptoj dënimin me gjobë, i cili dënim është i përshkruar si në dispozitiv të këtij aktgjykimi, paraprkasht duke e vërtetuar përgjegjësinë e tij penale juridike.

Rrethanat me rastin e matjes dhe lartësisë së dënimit.

Gjatë marrjes së vendimit mbi llojin dhe lartësinë e dënimit, gjykata ka vlerësuar të gjitha rrethanat lehtësuese dhe rënduese të parapara si në nenin 69 dhe 70 të KPRK-së, të cilat ndikojnë në zgjedhjen e llojit dhe lartësisë së dënimit. Si rrethanë lehtësuese vlerësoi faktin e pranimin të fajësisë në këtë fazë të procedurës nga i akuzuari për veprën penale për të cilën akuzohet, shprehjen e keqardhjes për rastin që ka ndodhur, bashkëpunimi i tij me gjykatën, ndërsa si rrethana rënduese gjykata mori për bazë shkallën përgjegjësisë penale të pandehurit, si dhe faktin se veprat penale të kësaj natyre janë të shprehura e në të tendencë të rritjes së tyre.

Gjykata pas vlerësimit të rrethanave lehtësuese dhe rënduese të elaboruara si më lartë, të njëjtit i shqiptoj dënimin me gjobë sikurse në dispozitiv të këtij aktgjykimit. Gjykata përkitazi me dënimin me gjobë mori për bazë pranimin e fajësisë dhe kërkim faljen, dhe me këtë dënim konsideron se i pandehuri e ka kuptuar rëndësinë e veprimeve të dëmshme dhe mbi bazën e këtyre rrethanave, gjyqtari është i bindur se dënimi i shqiptuar me gjobë është në harmoni me peshën e veprës penale dhe përgjegjësinë penale të të pandehurit si ekzekutor, duke marrë parasysh edhe faktin se i njëjti ka bërë pranimin e fajësisë, kështu gjykata vlerëson se me shqiptimin e dënimit si në dispozitiv të këtij aktgjykimi, do të arrihet qëllimi i përgjithshëm i dënimit i paraparë në nenin 38 të KPRK-së, përkatësisht dënimi i shqiptuar është plotësisht i justifikueshëm, në përshtatje me rrethanat e kryerjes, rrezikshmërinë e veprës penale dhe të kryesit, po ashtu ky dënim do të shërbejë në parandalimin e të pandehurit nga kryerja e veprave penale në të ardhmen (preventiva speciale), si dhe do të arrihet qëllimi që t'i përmbaj edhe personat e tjerë nga kryerja e veprës penale (preventiva gjenerale).

Vendimi mbi konfiskim

Gjykata në mbështetje të nenit 276 par. 1 dhe 2 të KPP-së, si dhe nenit 269 par. 3 të KPRK-së, ndaj të pandehurit ka urdhëruar edhe konfiskimin e përhershëm të substancës narkotike, më afër të përshkruar si në dispozitivin e këtij aktgjykimi, për faktin se i pandehuri nuk ka pasur autorizim për posedimin e narkotikut. Në anën tjetër, substanca narkotike e cekur sikurse në dispozitiv të këtij aktgjykimi, bënë pjesë në sendet që konfiskohen në mënyra automatike, andaj nga këto arsye gjykata ka vendosur ta konfiskoj përherë dhe substanca narkotike si e tillë ka urdhëruar që të shkatërrohet. Andaj, gjykata vlerëson se në këtë rast plotësohen kushtet dhe kërkesat ligjore për

konfiskimin e përhershëm të substancës narkotike sipas nenit 269 par.3 KPRK-së, që rregullon konfiskimin e detyrueshëm të sendeve të tilla.

Vendimi mbi shpenzimet e procedurës penale

Gjykata duke vendosur lidhur me shpenzimet e procedurës penale, në kuptim të nenit 449 par. 2 nën par. 2.6 të KPP-së, obligoi të pandehurin që në emër të paushallit gjyqësor të paguaj shumën prej 20 (njëzet euro) €. Po ashtu, konform nenit 36 par. 3 nën par. 3.1 të Ligjit Nr.08/L -109 për Kompensimin e Viktimave të Krimit, gjykata e obligoi të pandehurin të paguaj shumën prej 20 € (njëzet euro) në emër të Programit për Kompensimin e Viktimave të Krimit.

Mbi bazën e të dhënave si më lart, e në bazë të neneve 242 dhe 364 të KPP-së, u vendos si dispozitiv të këtij aktgjykimi.

GJYKATA THEMELORE NË PRISHTINË

Departamenti i Përgjithshëm – Divizioni Penal

P.nr.2433/23 datë 29.04.2023

Praktikanti gjyqësor

Sulltan Qallapeku

Gjyqtari i vetëm gjykues,

Bujar Ahmeti

KËSHILLË JURIDIKE: Kundër këtij aktgjykimi është e lejuar ankesa në afat prej tridhjetë (30) ditëve prej ditës së pranimi të këtij aktgjykimi, përmes kësaj gjykate, për Gjykatën e Apelit të Kosovës në Prishtinë.